

DOMENIE VII DI PASCHE

Antifone di jentrade cf. Sal 26,7-9

Scolte, Signôr, la vôs dal gno berli.
Il gno cûr a ti ti fevele, ti cîr la mê muse.
La tô muse, Signôr, o voi cirintle.
No sta platâmi alore la tô muse, aleluia.

Si dîs Glorie a Diu.

Colete

Signôr, scolte ben disponût lis nestris preieris
par che il Salvadôr de gjernazie umane,
che par fede o crodìn te glorie de tô maiestât,
nus fasi sintî ch' al è presint framieç di nô fint a la fin dal mont
come che lui stes nus à imprometût.
Lui ch' al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 7,55-60

O viôt il Fi dal om in pîts a la gjestre di Diu.

Dai Ats dai Apuestui

In chei dîs, Stiefin, plen di Spirtu Sant, al cjalà sù fis viers il cîl e al viodè la glorie di Diu e Gjesù in pîts a la sô gjestre. Alore al disè: «O viôt i cîi spalancâts e il Fi dal om in pîts a la gjestre di Diu». Petant grancj berlis, si stroparin lis orelis e si butarin intor di lui; lu sburtarin fûr de citât e si meterin a clapadâlu. I testimonis a poiarin i lôr vistîts dapît di un zovin di non Saul. E intant che lu claponavin, Stiefin al preave cussì: «Signôr Gjesù, cjol la mê anime». Po si pleà sui zenôi e al disè a fuart: «Signôr, no sta metiur in cont chest pecjât». E cun chestis peraulis, si indurmidì vie. Peraule di Diu.

SALM RESPONSORIÂL dal Salm 96

R. Danus vôi, Signôr, par viodi la tô glorie.

O ben:

R. Aleluia, aleluia, aleluia.

Il Signôr al regne! Ch' e gjoldi la tiere,
che s' indalegrin dutis lis isulis.
Nûl e scûr lu invulucin,
justizie e dirit a son il çocul de sô sente. **R.**

I cîi a contin la sô justizie
e ducj i popui a restin pe sô glorie.
I dius a son ducj inzenoglâts denant di lui. **R.**

Tu sês tu, Signôr, l' Altissim sun dute la tiere,
puartât cetant di plui di ducj i dius. **R.**

SECONDE LETURE Ap 22,12-14.16-17.20

Ven, Signôr Gjesù!

Dal libri de Apocalìs di san Zuan apuestul

Jo, Zuan o ai sintût une vôs che mi diseve: «Ve, o vignarai in curt e o puartarai daûrmi il gno mercedi, par dâi a ognidun seont lis sôs voris. Jo o soi l'Alfa e l'Omega, il Prin e l'Ultin, il Principi

e la Fin. Furtunâts chei ch'a lavin i lôr vistîts: a varan part dal arbul de vite e a podaran jentrâ te citât pes puartis. Jo, Gjesù, o ai mandât il gno agnul par testimonieâus a vualtris chestis robis in merit des glesiis. Jo o soi la lidrîs de çocje di David, la stele sflandorose de buinore».

Il Spirt e la nuvice a disin: «Ven!». E chel ch'al scolte, ch'al torni a dî: «Ven!». Chel ch'al à sêt, ch'al vegni; chel ch'al vûl, ch'al urissi dibant l'aghe de vite.

Chel ch'al garantîs chestis robis, al dîs: «Propit, o vignarai in curt!». Amen. Ven, Signôr Gjesù.

La gracie dal Signôr Gjesù ch'e sedi cun ducj vualtris. Amen.

Peraule di Diu.

CJANT AL VANZELI cf. Zn 14,18; 16,22

R. Aleluia, aleluia.

No us lassarai vuarfins,

al dîs il Signôr,

o tornarai di vualtris

e il vuestri cûr al sarà plen di gjonde.

R. Aleluia.

VANZELI Zn 17,20-26

Che ducj a sedin un.

Dal vanzeli seont Zuan

In chêt volte, Gjesù alçant i vôi viers dal cîl al preà cussî: «Pari sant, no prei dome par chei chi, ma ancje par chei ch'a crodaran in me in gracie de lôr peraule; che ducj a sedin un, come tu, Pari, in me e jo in te, par ch'a sedin ancje lôr in nô, di mût che il mont al cognossi che tu mi âs mandât tu.

E jo ur ai dade a lôr la glorie che tu mi vevis dade a mi, par ch'a sedin un come che ancje nô o sin un: jo in lôr e tu in me, par ch'a sedin rifinîts te unitât, e il mont al ricognossi che tu tu mi âs mandât me e che tu ur âs volût ben come che tu mi âs volût ben a mi. Pari, chei che tu mi âs dât a mi, o vuei che là ch'o soi jo a sedin ancje lôr dutun cun me, par ch'a contemplin la mê glorie che tu mi âs dade, parcè che tu mi âs volût ben ancjemò prime de creazion dal mont.

Pari just, se il mont no ti à cognossût, jo invezit ti ai cognossût e chei chi a an ricognossût che tu mi âs mandât tu. E jo ur ai fat cognossi il to non e o continuerai a fâural cognossi, par che il bonvolê che tu âs vût par me al sedi in lôr e jo in lôr».

Peraule dal Signôr.

Si dîs O crôt.

Su lis ufiertis

Acete, Signôr, lis preieris dai fedêi

dutune cu l'ufierte dal sacrifici,

par che, in gracie di chest at di sante religjon,

o podìn rivâ a la glorie dal cîl.

Par Crist nestri Signôr.

Antifone a la comunion Zn 17,22

Ti prei, Pari, ch'a sedin un,

come ch'o sin un ancje nô, aleluia.

Daspò de comunion

Scoltinus, Diu, nestri Salvadôr,

par che midiant di chescj sacrosants misteris

o podìn sperâ che in dut il cuarp de Glesie

si colmi ce che i à za sucedût al so cjâf.

Par Crist nestri Signôr.